

Kantonalni sud u Sarajevu poništio je ekološku dozvolu Federalnog ministarstva za turizam i okoliš, dodijeljenu slovenskom investitoru "Turbo-institut" za izgradnju hidroelektrana na rijeci Ljutoj u općini Konjic, izvijestila je Federalna televizija.

Pravna borba ekoloških aktivista u ovom predmetu trajala je više od tri godine. "Brane više od 30 metara ne mogu biti male, odnosno minihidroelektrane – kako je projektom predstavljeno. Potapanje kanjona znači definitivno uništavanje kanjona", kaže ekološki aktivist Kenan Muftić.

Izdavanje dozvole pratile su brojne nelogičnosti. Slovenski investitor nakon dobijanja koncesionog prava za gradnju mijenja projekt. Umjesto minihidroelektrana planira izgradnju tri hidroelektrane. Upkos promjeni dobija ekološku dozvolu Federalnog ministarstva za turizam i okoliš. To je urađeno pet mjeseci mimo zakonskog roka, bez kvalitetne studije o utjecaju na okolinu, javne rasprave i dozvole lokalnog stanovništva, stoji, između ostalog, u presudi.

Sada je presuda korektiv koji jasno precizira, pojašnjava advokat ekoloških aktivista Nermin Vila, "da se napravi izuzetno kvalitetna javna rasprava sa svim zainteresovanim udruženjima i pojedincima, da se da dovoljno vremena da se izjasne i da se njihov stav čuje".

Iako je presuda prošla neopaženo, dobar je povod za opomenu svim drugim investitorima koji planiraju slične projekte u našoj zemlji. Opomena je i za državu, jer otvara i pitanje nepostojanja strategije za energetske efikasnost na državnom nivou. Entiteske strategije postoje, ali Evropa od nas traži razgovor s jednom adresom.

Da je imamo, lokalno stanovništvo više bi se pitalo o energetske projektima u svojoj zajednici, smatraju stručnjaci.

izvor: indikator.ba